

痧喉正義

痧喉正義敘

喉證一門自古本有專科按方取義不待智者而自知然
識證固屬不易知時則爲尤難南北分途寒溫各異喉證
發於天氣炎亢之時其常也發於陰雨溼蒸之候其變也
同學張君筱衫攻舉業之暇考究方書厯有年所緣今歲
邗上喉患盛行死亡相繼目擊神傷乃集先輩治喉之良
法綴以案語名曰痧喉正義抉擇甚精折衷極當宜今秋
邗上賴君全活者甚眾良工心苦可敬可慕書成索序於
余余勤菲庸材何敢妄議不得已勉贅數言聊以塞責未

免令方家齒冷爾時光緒十五年十一月下澣興化江曲
春澤之敘於海陵客館

痧喉正義敘

疫者何穢濁氣也西人謂之炭氣疫何以爛喉其氣徑鼻入肺喉爲肺之門戶故病見於此也又何以發痧疫氣道氣管趨血管道血管周一身故由此達表也其證古少今多且每發於人煙稠積處者地球生氣日濃炭氣亦日重人繁穢盛穢盛故疫多也翔自弱冠學醫於內景諸說竊滋疑焉繼知玉田王氏親見臟腑亟取其書觀之竟翻軒岐以來四千餘年之成案顧亦未敢遽信後聞西醫剖視遺骸復求讀其書標新領異詫爲海上奇談去歲道經滬

瀆觀西醫蠟範人形歸取其書再讀之始恍然於其說之
果有據也蓋其議論與王氏多隱合與靈素及後世諸家
亦消息潛通試舉數端以證疫喉痧之說地球之上生氣
瀰綸西人分濃者爲養氣淡者爲淡氣清者爲清氣濁者
爲炭氣謂穢濁之區炭氣所聚人多病疫與喻張葉吳諸
家謂疫爲穢邪程鏡宇謂疫爲濁陰地氣詳略不同所見
一也其謂肺中有氣管二歧爲眾小管管末端有氣胞與
血管網支相連網支下達心心運血歷周身微絲血管入
迴血管還至於肺此卽吸入之邪由氣入血之道路葉香

巖謂肺邪逆傳心包吳鞠通謂痧爲血絡中病二說與之
相符竇氏沙氏治疫痧用活血藥亦此意也又謂人一吸
入養氣一升一呼出炭氣一升草木之葉出養攝炭與人
相濟故山林人少疫輕城市人多疫重與紀文達筆記人
氣最熱之說足相發明西書雖立論新奇而精詳確鑿實
與中國醫學殊途同歸王孟英稱其說理最精非虛揣空
談誠知言哉竇應張筱衫先生見疫喉痧證曰多天殤接
踵乃折衷諸說彙爲一書辨證立方各法具備名曰痧喉
正義將付剞劂屬爲弁言遂述管見如此先生其笑我爲

醫中楊墨亭光緒十五年己丑十二月江都孫鳳翔犢山敘

痧喉正義敘

方今行疫癘之氣發痧喉之證刊上爲最一家病者或亡
二三或亡四五其故何哉自八月下旬雨至十月初旬乃
止晴曦溫暖冬勝於春溼鬱熱蒸釀成疫氣氣由口鼻而
入病居肺胃之間初發憎寒壯熱煩渴不甯痧點隱隱咽
喉紅腫白腐幸獲余診則危者安逆者順矣聞有病勢垂
危邀余治之十救一二殂者七八小兒輩較多於焉目擊
心傷揆其所自或因投升柴羌葛一切風燥諸品升提痧
毒盤踞吸門一誤也或服麻黃桂枝蒼朮香砂一切辛熱

藥味助毒上衝俾痧毒壅蔽不能外達致成內攻之患二
誤也抑或外感新涼不知宣表遽以芩連黃柏大黃一切
苦寒之劑用以泄火實則冰伏疫毒遏鬱不發熱愈盛喉
愈爛致成悶斃三誤也又或不知禁忌腥膻炙博甜黏米
飲之類俾助胃火熏蒸閉塞四誤也余方於釐正按摩要
術四卷鬻嬰提要說一卷之後爰集近來各家疫喉痧證
治或著一說或註成書每篇後繫以案語是則是非則非
以歸於正顏曰痧喉正義以求方家匡其不逮共救海內
之染是證者光緒十五年十月中澣寶應張振鋆筱衫敘

痧喉正義凡例

一痧喉一證近來層見疊出天殤頗多最爲可憫總由初病誤治既誤猶不自知遂至以誤沿誤貽害無窮故出是書以正之

一先賢以及近來各家所論疫證痧證喉證理合采輯以備參考疫喉痧合三證而爲一證也

一痧喉古無證治雍正乾嘉以後方有論說或著成書允宜彙集成編其詞意之重複者汰之冗長者節之務期簡淨不支

一痧喉陳編瑕瑜互見每分一則綴以案語力爲辨晰當
褒者褒之當貶者貶之俾知所遵從也

一書無圈點明通者尙能清晰淺庸者句讀莫分是書可
法者連○不可法者△驗方連○以期一目了然

痧喉正義一卷目錄

喻嘉言論疫

葉香巖論疫

余師愚論疫

鄒滋九論疫

顧祖庚論疫

王孟英論疫

王晉三論痧

葉香巖論痧

余師愚論痧

邵新甫論痧

陳元益論痧

屠彝尊論痧

繆仲瀉論痧

吳鞠通論痧

張善吾論疫喉

吳鞠通論疫喉

李純脩論痧喉

祖鴻範論痧喉

唐迎川論痧喉

王步三論痧喉

高錦庭論痧喉

陳繼宣論痧喉

顧玉峯論痧喉

朱鐵山論痧喉

王孟英論痧喉

沙耀宗論痧喉

程鏡宇論痧喉

王聘之論痧喉

施小橋論痧喉

痧喉正義總論

痧喉正義一卷

寶應張振鋈校衫輯

喻嘉言論疫

順治年間喻嘉言名昌西昌人也著有尙論篇醫門法律
寓意草其論疫則曰溼溫一證卽藏疫癘在內一人受之
則爲溼溫一方受之則爲疫癘此卽仲聖所云清濁互中
之邪也石頑亦云時疫之邪皆從溼土鬱蒸而發土爲受
盛之區平時污穢之物無所不容適當邪氣蒸騰不異瘴
霧之毒或發於山川原陸或發於河井溝渠人觸之者皆